

國朝先正事略

國朝先正事略卷之二十六

名臣

平江李元度次青纂

江忠烈公事略

弟壯節公忠濟

公諱忠源字岷樵湖南新甯人爲諸生究心經世學不屑屑章句充道光丁酉拔貢是科舉於鄉甲辰大挑得教職新甯地接廣西民獠雜處多盜公察天下將亂倡行團練法以兵法部勒子弟是爲湖南團練之始丁未秋獠民雷再浩勾廣西賊爲亂監法道楊君炳堃總兵英君俊來縣合剿議徵兵公力止之自率鄉兵擣其巢再浩擒事定賞監翎以知縣用是爲公以鄉勇討賊之始戊申謁選發浙江權知秀水邑被水災公勸分設

賧收棄孩。獨正賦民忘其災。計擒劇盜十數人。邑大治。巡撫吳文節公文鎔待以國士。補麗水會。

文宗皇帝登極。詔中外各舉所知。侍郎曾公國藩具疏薦有旨召見。吳公疏畱辦海塘工。閱四月工訖。以父憂歸。時廣西賊首洪秀全楊秀清等稔亂。朝命大學士賈尙阿公出視師。聞公知兵。疏調軍前。副都統烏蘭泰公忠勇負氣。與他將多齟齬。一見公深相倚重。公募故所用鄉兵五百人。使弟忠清帥以來。號楚勇。是爲公以湖南鄉勇出境討賊之始。始至敝衣槁項。諸軍皆匿笑。時賊氛惡甚。官兵數萬莫敢撓。公築壘逼賊營。賊以其少且新集。易與也。急犯之。公堅壁如不敢戰。賊近壘始開壁。

馳之斬首數百。烏公拊掌語人曰：君等蔑視楚勇，今何如？侍衛開隆阿者，善射，奇中，嘗射虎十數，軍中號打虎將者也。公長揖過之，意嗾公。一日戰被圍，矢且盡，公登高阜望之，曰：必開公也。怒馬馳救之，並轡歸。開公拜曰：活開隆阿者君也。遂握手飲，極歡。累功擢同知直隸州。賞花翎。時賊萃永安，官軍環之，闕城北一面。公與烏公請掘長壕聚礮之，弗聽。明年春以病歸。賊果由北路犯桂林，四總兵陣歿。烏公以刀刺臂，灑血盤水中，呼將士共飲，涕泣誓師。援桂林，公在新甯亦力疾起，出私財增募千人。與今直隸總督劉公長佑倍道赴援。至則烏公中礮卒，城圍逾月。公進扼東岸之麟鵠洲，三戰皆捷。四月朔，桂林圍解。擢知

府賊趨全州。公聞道敗之。唐家司全州既陷。銳意趨湖南。公先諸軍扼富塘埔。賊度不能越。則悉載輜重舟中。期水陸並下。公伐樹塞河。截賊蓑衣渡。鏖戰兩晝夜。逆舟挂樹不得前。僞南王馮雲山中礮死。盡獲其輜重。賊遂東走道州。初公慮東岸空虛。白當事請分軍扼截。弗許。請躬率所部往。又不許。至是賊果由東岸竄湖南矣。方賊之奪舟而下也。天雨水漲。由永州至衡州。數日可達。程總督商采時駐衡。聞警走長沙。知府陶君恩培留之。不可。鮑提督起豹亦議去。永州會聞蓑衣渡之捷。人心稍固。總督仍還衡郡。及賊踞道州。眾猶不滿萬。公慮日久。蓑脅眾乃建議分防。不如合剿。遠堵不如近攻。七月賊自藍山嘉禾犯桂。

陽旋陷郴州。公上言：後路追剿愈急，前路攻陷愈多，請仍申合剿議。當事皆漫不省。賊則益張。公在郴州，約總兵和春、公由石子嶺潛師出賊前，未至，賊竄永興。以萬眾畱郴，相牽制。公策永興賊必由茶陵醴陵犯長沙，乃倍道由衡州援省。會賊已踞城南，及小西門窟穴於民廛，攻甚急。南城外天心閣地勢高，賊方棚其上。公望見，驚曰：賊據此，長沙危矣！急帥所部爭之死傷二十人，督戰益力。賊退趨移壘，去賊數十武，共汲一井，擊柝聲相聞。自是長沙止南門受敵。賊巢背水面城，當絕地。雖後隊踵至，無能爲矣。會偽西王蕭朝貴中礮死，賊數穿地道，又先後爲副將鄧君紹、良瞿君騰龍所拒，氣少沮。逾旬，洪楊大股至，勢倏

復張公弟忠濟自郴尾之約公夾擊方戰賊伏叢冢間挺矛刺公傷腓墜馬遇救免時新撫張公亮基至前巡撫賂公秉章與幫辦軍務前湖北巡撫羅公繞典均夙契公就詢方略公以官軍四面集惟河西一路虛請調重兵駐龍迴塘扼賊竄路期盡殲張公尤韙之而河西諸將逡巡莫敢前當是時賚公罷免新帥徐公廣緒久不至城內外巡撫三提督二總兵十莫相統攝謀用不成公憤甚躬赴湘潭力請於徐公不省賊卒由龍迴塘竄出掠舟西遁而東南大局隳矣十一月公追賊至臨資口屬巴陵土寇起檄公畱剿事平而瀏陽匪渠周國虞之事起先是國虞等故與粵西賊共爲邪會眾萬餘人粵賊至卽起應之已

復止。當事始掩覆之。至是將乘官軍之下。爲亂湖南。公出不意。進討。張示散脅從。許自首免誅。十二月十八日。賊來犯。設伏敗之。斬首七百。首免者萬餘人。擢陽平。公時以援湖南功。擢道員矣。三年正月。張公權湖廣總督疏調公。旋授湖北按察使。時賊棄武昌東下。公私埽地。一切倚公辦。又平民之起爲賊者。通城劉立簡。崇陽陳百斗。嘉魚熊開宇等。有眾數千。皆討平之。遂奉幫辦江南軍務之命。公拜疏言軍事。請嚴軍法。撤提鎮。汰弁兵。明賞罰。戒浪戰。察地勢。嚴約束。寬脅從。凡五千餘言。又疏請四川湖南北三省。分造戰船。習水師。令廣東籌款鑄礮。是爲公籌畫東南大局之始。疏入。

上嘉納之。四月，公率軍東下，廣濟賊朱關祐等抗糧爲亂，戕守令聚眾數萬，公就便征之，戰三捷，斬首五百有奇，生擒三百人，釋其半，令轉相解散。詰旦，賊大至，又敗之。訊俘多卽釋歸者，乃駢誅之。五月，至九江，賊自皖江沂流上，距城四十里，憚公威名，不敢近，改由彭蠡犯南昌。時公奉命援鳳穎，卽抗疏改道，援江西軍士方患暑疫，泚之，得人千三百。以五月十六夜抵南昌，凡三晝夜行五百里，賊不意公乍至，驚曰：「來何速也！」章江門最受敵，公自當之，宿譙樓，燕城外民舍十八日，賊舟蔽江至，薄城礮擊之，稍卻，趨得勝門，以門外民居阻雨未盡焚也。方賊至，營兵四人將縋城走，公立斬以徇。曉夜躬巡，礮碎從者首，不爲動。

賊穴地轟城。公鑿隧道迎之。三次藥發陷城八十餘丈。公及弟忠濟力拒之。賊死傷山積不能入。

上頒賜玉翎管及挾拾各二。時湖南援師先後集。賊氣沮。圖竄吉安臨江。而安福泰和萬安寇復起。公乃分軍樟樹鎮扼賊衝。檄羅公澤南等勦泰和各屬。平之時。羅方以訓導援江西也。八月二十二日。圍解方。公遣援時巡撫以下皆持不可。公曰。南昌兵逾萬。畱三千人不見多。若泰和賊與南昌賊鉤連。上下路絕。此危道也。已獲賊諜。得其往來書。果約急攻吉安。如公言。捷聞。天子加公二品服。當是時。公義聲震天下。師及德安聞賊上犯。公急往助守田家鎮。以二千人渡江。而令後至者閒道趨武昌。

備緩急時司防者武昌道徐君豐玉漢黃道張君汝瀛用戰艦扼江而南岸半壁山不設備公至訝之急揮兵據險賊已先我至水陸交訌師遂潰公至甫一日也徐張二公死之黃州漢陽陷惟武昌以公援應得全賊懼公躡其後尋引去初公以田鎮之失鑄四級至是奉命巡撫安徽公疏請增兵萬人當一路又念行省新改廬州爲南北樞紐去稍遲賊且北竄遂以二千人先發而湖北巡撫崇綸強畱公所遣援軍公於是益孤矣抵六安適舒桐告陷士民遮道畱公公病入城繕守備人心稍定廬州警報日夕至知府胡元煒具言城中軍實裕團丁可萬餘人請速往公乃畱千人守六安自率數百人入城知府來謁公

詢守具。以方籌畫對。緇糧軍火一無有。公審其有異志。擬誅之。米果越二日。賊大至。團丁鳥獸散。公力疾登陴。誓死守城。周二十六里。合主客兵。裁三千。賊仍用地雷轟大西門。月城繼轟文昌門。公親督楚勇殊死鬪。殲賊數百人。疏陳守禦狀。

上特賞公霍隆武巴圖魯名號。賊自十一月十二日合圍。公堅守逾月。賊奪氣將遁矣。有內奸以城中食乏。軍火且盡告。遂增闕隧道。以十二月十七日昧爽。併力攻。逾牆水西門。城塌十餘丈。公且戰且修築。忽傳賊自南門緣梯入。人聲鼎沸。公知事不濟。掣佩刀自刎。左右持之一僕負公行。公不可則嚙其肩及耳。血淋漓。僕創甚。委公於地。賊逼。公轉戰至水關橋之古塘。被七

創奮投橋下死之同殉者同知鄒君漢勳參將馬君良勳自六安從公入城者也參將戴君文瀾縣丞艾君延輝自湖北來援乘間入者也布政使劉君豫鈐池州知府陳君源寬同知胡君子雝副將松安君縣丞興福君皆死而知府竟降賊前以城中虛實告及置梯南門皆其勇目徐淮所爲也公困孤城時援師十餘壁皆不能前十二月十二日公弟忠濬自湖南募師來援與劉公長佑殊死戰不利及再戰而城陷矣後八日舊卒周昌發冒死入城負尸出面如生事聞

上震悼追贈總督賜祭葬子諡忠烈封公三代如其官

命廬州及湖南江西各建專祠公性英烈與人交披瀝肝膽終

始不渝。同年生武岡曾如鑑。暨湘鄉鄧鶴齡。陝西鄉興愚。先後客死京師。貧不能返葬。公皆身護其櫬歸。治軍推赤心。待人得其死力。所過無秋毫犯。每戰親陷陣。踴厲風發。誓不與賊俱生。尤料敵如神。能以至少擊至眾。故所向有功。居圍城。每夕必巡城一周。見士卒食苦。輒呼匕箸。取嘗之。曰。適巡城。飢與君一共此味耳。以故士卒感服。無忍背者。賊起嶺西。尚蠻耳。王師且十萬環視。莫敢先。公以書生倡勇敢軍。氣爲一變。其後楚軍輩出。卒克金陵。夷大亂。皆公風聲所起也。公建三省會勦議。請治舟師。扼上游。今大學士曾公卒用此。肅清江面。成大功。公存亡實關天下安危。豈僅以一死激頑懦哉。初公計偕入都。嘗過曾公。

語移時去。會公目送之曰。平生未見如此人。旣而曰。此人必立名天下。然當以節烈死。自公死。海內識與不識。下及婦人孺子。皆爲流涕。祠祀徧江以北。公旣薨之二年。

上猶下前疏軍中。其知公深矣。五年。援賊屯大蜀山。上有公祠。夜見列炬熒熒。劍槊聲相摩。賊驚遁。祠得全。喪歸。柩尙在城。別賊自東安犯新甯。攻七晝夜。敗去。訊賊黨具言。酣鬪時見藍旗軍突出。遂不支。藍旗者。公部向所用旗。時實無此軍也。或謂公靈不昧。雖死猶殛賊云。公年四十有二。父上景。歲貢生。昆弟四。公長。次忠濬。今任四川布政使。次忠濟。道員。陣歿。通城。次忠淑。累擢道員。子二。孝椿。以忠濬子嗣。孝棠。遺腹生。

忠濟字汝舟。幼從忠烈公學。道光二十九年。李沅發作亂。公倡募鄉勇。有復城功。咸豐二年。粵賊犯長沙。佐忠烈守城。戰甚力。三年。忠烈赴武昌。以舊部千人屬君。與劉君長佑留長沙。剿土匪。及忠烈剿賊通城。時崇陽嘉魚賊竄起。忠烈兵單。君與劉君倍道進援。抵崇陽。大破賊。斬首逆陳北斗及餘黨數百人。進攻通城。賊數萬圍官軍。數日。忠烈拊君背曰。非弟不能破此賊。語未竟。君挾雙刀大呼躍出。眾從之。忠烈援枹鼓助戰。眾殊死鬪。賊大潰。生擒渠魁張西園等二十餘人。斬獲無算。湖北土匪平。及守江西。賊轟城。圯十餘丈。君督壯士百餘。囊土築之。俄而城大圯。築者悉陷。君跳而免。越二日。地雷復發。城圯八十餘丈。賊

譟而登。君斬先登者二人。賊乃退。麾勇急築之。復穿地道出城。鑿濠城下。引水注之。賊所爲隧道盡廢。省城獲全。君先以功保通判。加五品銜。賜孔雀翎。至是圍解。詔擢知府。尋以省母歸。君弟忠淑奉檄剿賊通城。兼督沿團練。會以疾請假。巡撫駱公命君往代。尋調赴永州。堵剿粵寇。敗賊於藍山。再敗諸嘉禾。又敗諸甯遠。連復三城。殺賊二千計。詔以道員用。六年。駐防岳州。湖北巡撫胡文忠公請移剿通城。至則召本地團勇千餘。置營後。助聲威。出不意破賊四營。賊遂悉銳來犯。衆數萬。四面圍官軍。或勸君宜退。叱斥之。戰益力。賊從後營攻入。團勇驚散。陣亂。君立營門大呼殺賊。手刃回顧者數人。策馬奮砍力竭。遂

死之年三十有八。時四月四日也。是役營勇三千死。幾盡無一降者。事聞。贈按察使銜。予卹典。同治元年。朝廷追念死事諸臣。與忠烈公同膺。諭祭。特旨予諡曰壯節。

塔忠武公事略

咸豐四年三月。粵逆數萬人。自金陵溯大江而上。越安慶武昌。再陷岳州。過洞庭。以戈船徧布臨資口等處。知長沙有備。遂由湘陰破甯鄉。閒道襲湘潭。湘潭居長沙上游。百貨所輳。賊掠舟萬計。分黨溯流。窺衡永。當是時。賊挾百勝之勢。料官軍無能挫其鋒。既得湘潭。長沙不攻自困。塔忠武公時方爲副將。聞警。投袂起。帥所部兵勇。會同水師血戰五晝夜。大破賊。殲獎溺獎。燬獎數萬計。時所部千三百人耳。微此戰。賊且溯湘源。以達粵西。老巢直下。通金陵首尾。一江相貫。注大局。將不可支。烏虜公之功在社稷。豈尋常一手一足之爲烈哉。自時厥後。公威名震

天下出湘而岳而鄂所向克捷雖婦人孺子罔不知有公使天
假公年平賊當較易顧以暴露行閒久積勞成疾賁志卒於軍
此朝野官吏軍民無論識與不識莫不同聲一哭爲公悲且爲
天下生民悲也公諱塔齊布字智亭姓托爾佳氏滿洲鑲黃旗
人生而神識沈毅都統烏蘭泰公夙器之由火器營護軍擢三
等侍衛咸豐元年發湖南以都司用二年秋賊犯長沙以守城
功擢遊擊賞藍翎署中軍參將時在籍侍郎曾公國藩奉
命督治鄉兵用明威繼光法訓練束伍每校閱公必短後衣赭
屬帶刀侍曾公與語奇之試所轄兵皆精練副將潘德方忌公
嗾提督將加摧辱曾公乃劾罷副將薦公忠勇可大用且云塔

齊布將來如出戰不力臣甘與同罪得旨加副將銜三年剿
茶陵安仁土匪賞換花翎記名以副將用四年二月率所部
由平江進剿湖北通城崇陽賊會官軍失利岳州賊乘勢上犯
曾侍郎水師退保省河公隨有湘潭之捷公之剿湘潭也始至
次高嶺賊卽奄至公手大旗麾軍士縱擊斬僞先鋒元帥九人
賊敗潰逐北數里至城下明日賊大出犯公伏兵山左右設礮
三重誘之及賊逼礮發以百數賊大亂伏起夾擊之賊奪路走
僵尸相枕籍遂薄城圍殪悍賊數百公深入幾中伏跳而免麾
兵鏖鬪大破之城北賊柵皆盡其南則水師會剿焚賊舟數千
并焚市廛使城外賊無所止火光燭天三日夜浮尸蔽江下其

時領水師者楊公岳斌彭公玉麟及褚觀察汝航夏同知鑾也。四月二日賊棄城夜遁。凡六日湘潭平。詔加公總兵銜。賞喀屯巴圖魯名號。命署湖南提督。未幾卽眞。先是提督鮑起豹以清德之譖屢斥辱公。至是起豹罷。公代其位。軍民快之。時敗賊猶駐岳州。分黨陷常澧。公馳抵新牆。破土城三座。舟師亦敗賊雷公湖。又敗之道林磯。公與羅忠節公澤南李忠武公績賓合軍攻岳州。敗賊於高橋。閏七月二日盡破賊壘。賊棄城退踞城陵磯。未幾賊舍舟登陸。將據險爲營。分三路來撲。公亦分三路擊之。賊抵死抗拒。良久始敗潰。追至擂鼓臺。殲賊八百有奇。公臨陣好匹馬衝鋒戒從者不必從從亦無能及者。尤好單

騎薄賊壘。覘虛實。賊屢馳之。瀕危得免。有天幸。一日攜親卒四人進。覘播鼓臺。突遇悍酋。鬚睥目直。呼公名。橫矛刺其馬。欲擒公。親卒黃明魁躍起。刺酋墜馬。酋回刺明魁。傷右脇。公親刃酋。殪之。獲賊旗。視所署字。知爲僞丞相曾天養。天養驍桀。爲賊魁。自楊秀清以外。皆爲之下。伏誅。後賊黨爲之茹齋六日者也。賊旣失悍酋。奪氣。退踞武昌。公與羅公自臨湘進。勦長安驛。羊樓崗。佛嶺。大沙坪等處。賊屢捷。復崇陽。蒲圻。咸甯。又敗賊於官步橋。及徐李埔。遂與羅公進屯江夏之紫坊。初。曾公在城陵磯。約諸軍會紫坊。至是召諸將議。攻取武昌。策定。議羅公帥師攻花園賊壘。水師扼長江。公從油坊嶺趨扼洪山。山在武昌城東。

北左近梁子湖。右隔湯孫湖。係絕地。爲竄賊所必由。時城賊懼。以八月二十三日。啟東北門遁。公扼而截之。賊路斷。迎斬黃衣賊日數名。賊崩奔。悉趨山背。復麾軍圍逼於沙湖塘角。聞賊爭赴水死。填尸幾滿中。多幼孩。公見之大哭。傳令拯救得二百有奇。羣賊因而乞命者。又七百有奇。分別誅釋之。武昌旣復。進攻大冶。戰於五里牌。斬黃衣騎馬賊。賊大奔。燬賊壘二。亡何賊反鬪。伏突起。刺傷公坐馬。左右兩軍合擊。賊復大潰。爭橋渡橋。斷多墮水死。生擒百二十四人。是日羅公有興國之捷。於是兩軍會於興國。籌進取。羅公西擣半壁山。公東勦富池口。十月二日。戰軍山背。克之。屯其地。距羅軍十餘里。中隔小河。方造浮梁。

濟忽出賊千餘過渡處別賊數千陣半壁山左右與羅公大戰公隔河爲聲援賊大敗旣又由富池口沿岸而上冀襲我軍後公擊走之浮梁成初五日田鎮賊渡江來犯公與羅公夾擊之殲賊四百餘溺斃半之是時賊所設橫江鐵鎖在南岸者已斷而北岸猶未破十三日水師大戰公及羅公列陣半壁山護之燔逆舟數千北岸鐵鎖悉銷燬賊遁竄廣濟黃梅山鎮旣克得旨賞穿黃馬褂予騎都尉世職二十日公及羅公渡江繞至蕪州及賊於蓮花橋過伏我前隊稍卻公匹馬突陣手刃大旂賊追奔數十里遂復廣濟而黃梅爲賊必爭地悍酋秦曰綱陳玉成羅大綱併力守之以數萬賊分布小池口孔壠驛而立堅壘

五於大河。浦龍頭寨等處嚴密。與田鎮博。十一月朔。師次雙城。驛賊數路來犯。公與羅公併力擊之。追奔十里。破其五壘。斃賊三千餘生。擒九十餘。越日進次夏新橋。距城四里。公與羅公登山望。知北門可攻。遂親進搏我兵。肉薄而登。多受創。公頭被石擊。流血被面。督戰益厲。卒克黃梅。曾公疏陳戰狀。有詔戒公輕進。公讀之。感泣。尋攻孔壠驛。驛南通小池口。東臨水。賊於西南北築土城。公從西南路進攻。累肩爲梯。卓矛而躍。遂大破之。賊悉竄小池口。分黨奔湖口。與九江相犄角。爲死守計。公遂與羅公渡江。攻潯城。十二月朔。攻西南門。不拔。驍將童添雲死之。會水師被賊襲。喪矢輜重。而賊師率從江北接濟。羅公從二套。

日渡江進攻小池口。公率壯士二十人渡江督戰。以眾寡不敵。敗。且戰且退。公匹馬衝突。爲諸營扞蔽。有黃衣賊酋三人策馬來犯公。以套馬竿圍一酋頸斬之。且奪其馬。餘賊皆靡。公俟大隊沿汀上。單騎馳入鄉閭。馬陷泥淖中。幾失道。有田父夙耳公名。畱匿其家。時除夕前一日也。次日各軍以公未歸。營洶洶失所倚。有泣者。夜三鼓。鄉民忽送公渡江。歸。曾公羅公皆躍起。跌而出。握手相勞。苦繼以泣。公談笑自若。曰。飢甚。速具飯。啖我。時合營皆驚。喜歡聲如雷。飯罷。已元旦矣。五年正月六日。城賊出犯。公擊斃二百有奇。生禽二十有一。公令暗伏地雷。誘賊來撲而陷之。果斃百餘賊。其後賊屢捷而城終不下。六月。曾公與公

約會於青山。曾公謂宜移師東渡。勦湖口及東流。建德長驅直下。公以攻具方備。誓力破此城。七月十八日。傳令攻城。忽患氣脫。日中薨於軍。年三十有九。事聞。

上震悼。照將軍例。賜卹。廕襲如例。許入城治喪。賜祭葬。手諭忠武公。長身火色。居平粥粥。若無能及。臨陣奮拳。切齒。口角流白沫。若欲生啖賊者。所乘鐵驪。絕有力。湘潭之捷。殲賊。會所得也。每戰。不令士卒出已前。他軍被圍。或小卻。必驟馬馳救。背負火鎗一腰刀二。手長矛及套馬竿各一。技皆精絕。無虛發。每逼賊。壘覘形勢。比賊覺去已遠。賊巾驚以爲神。而公雍容恬退。未嘗一自詡也。天性忠孝。自擢提督。於左臂渥忠心報國。

字左右嘗以海燕窩進公愀然曰吾母夫人在都不知能給朝夕否忍甘此耶深夜呼親卒與絮語家事每至泣下偏裨小校直入內幄白事不俟傳宣治軍紀律嚴秋毫無所犯與最下卒同甘苦德化令進堯席以士卒皆卧草上卻之及薨軍民逾時悲泣喪車過南昌所乘馬服鞍轡隨行將入城忽滿身汗涇人謂公靈實乘之云湖南江西及九江湘潭均奉旨建專祠公娶于氏生女一無子以弟子永承嗣其弟莽阿布先一年戰死獨流軍中

羅忠節公事略

本朝武功邁前古。所用皆八旂暨東三省勁旅。各直省綠旗兵。嘉慶初。平定川楚教匪。始以鄉勇輔兵之不足。然十裁二三耳。迨粵逆起。而楚勇。湘勇。名天下。營兵或反爲世詬病。此二百年來兵制之一變也。楚勇始自江忠烈。湘勇則自羅忠節。公始公諱澤南。字仲嶽。號羅山。湖南湘鄉人。幼穎悟。十歲能文。家酷貧。溺苦於學。夜無油。把卷讀。月下倦。卽露宿。達旦。年十九。喪母。明年。大父及兄嫂歿。二十九。長次子及三子皆殤。是歲爲道光乙未。大旱。饑疫作。公罷試。徒步歸。夜半斂門。則其妻方以哭子喪。明時。飢甚。索米爲炊。無有也。己亥。補縣學生。年三十有三矣。又

八年始食廩餼。公自少篤志正學。好儒先性理書。賀制軍長齡。唐太常鑑皆重之。制軍延課其子。咸豐元年。詔舉孝廉方正。當事以公應。二年。粵逆洪秀全等犯長沙縣。令屬公練丁設防。號湘勇。明年。侍郎曾公國藩奉命督治團防。適江西上猶土匪竄桂東。檄公進剿。行次衡山。忽草市寇起。眾千餘。公禽首逆劉積厚等二十餘人。進擊桂東賊。走之。時粵寇圍南昌。公帥湘勇赴援。既至。土賊陷太和安福圍吉安。公與劉公長佑往援。勦賊解圍。遁。公追至安福。復縣城。日夕賊大至。敗之。明日。又至。我軍鏖戰一晝。百斬馘無數。敗賊竄入湖南。巡撫駱公秉章檄公回剿賊。尋遁。會永興土寇亂。曾侍郎檄公往剿。戰於油榨墟。平。

之公初以湘勇三百破安福賊數千與李公續賓分帶中右營其七百人至是增至千人屯衡州再平草市土寇斬首逆王大漢四年夏湘潭賊退公與提督塔忠武公會師東下六月攻岳州公以大橋路爲賊所必爭率所部扼橋守三戰皆捷殲賊千閏七月二日破高橋賊壘九賊退踞城陵磯公與塔公乘勝進擊連破賊營三賊宵遁是役也公獨當大橋一面功最偉云尋自臨湘進駐長安驛賊分四路來犯公令偃旂息鼓乘閒突起擊之賊大潰又破賊羊樓崗追至百花嶺再破之佛嶺進屯虎爪市連破桂口大沙坪賊壘復崇陽時武昌賊分黨由金牛入咸甯公擊走之追敗之官步橋又敗之金牛遂進駐江夏之紫

坊始會公約諸軍會紫坊及是召諸將至金口議攻武昌策公
出所繪圖言紫坊出武昌有二道一洪山大路一沿江出花園
當以重兵勦花園而分兵扼洪山防反竄諸將未決公請身任
其難遂自攻花園而令塔公出洪山時花園悍賊萬餘築堅壘
三一枕大江一瀕青林湖一跨長堤深溝堅柵列巨礮爲固入
月二十一日官軍水陸進攻公直趨花園賊憑木城轟拒我軍
伏地進分兵奪賊舟數十舟賊退營賊亦亂乘勢踰溝摩其壘
同時並下翼日攻鮎魚套賊營川勇卻公擊賊堤上隔溪不能
救街口賊乘機出逼公奮擊敗之李公由江岸回援又大敗之
賊竄洪山爲塔公所膊是夕棄城遁二十三日武漢城皆復距

會議時七日耳。鄂城之克，實公本謀也。九月，師出金牛，敗賊於沿埠頭。克興國塔，公復武昌、大冶，遂規取田家鎮。鎮居大江北岸，與半壁山斜對，爲上游門戶。舊設防兵，陷於賊。賊更爲鐵鎖以截水師，而用重兵屯半壁夾江以守。十月朔，公搗半壁山賊數路來犯。公策馬衝陣，賊敗奔江邊，墜之墮水死者千人。初四日，塔公造浮橋渡小河，爲賊所遏。賊自半壁傾巢出北岸，賊渡江助戰者近萬人。僞王坐將臺督戰，龍旂黃蓋，勢張甚。時公所部僅二千六百人，衆色沮，有潛遁者。李公飛騎追三卒，回手刃之。軍心乃定。公令堅伏弗動，度賊銳已竭，突起急攻賊，大潰。悉奔半壁山而後路爲我軍所扼，不得上。皆觸石墜崖死，凡數千。

水師亦蔽江下斷橫江鐵鎖燔賊舟四千餘艘火光夜照數十里水陸夾擊田鎮平尋渡江次菩提埧塔公已先至兩次伏賊起皆擊敗之擒斬千三百遂復廣濟十一月進軍雙城驛賊扼險而營一鼓登山平其壘抵黃梅與塔公奪柵入縱火攻之賊竄城復遂進軍濁港遇悍賊解衣出戰堆積市肆間公焚之斬賊千餘生擒數十餘賊退保孔壠驛賊酋羅大綱復從湖口率萬人至公分兵抄襲街口賊賊敗歸壘攻破之太綱逸去是役以五千人破賊二萬賊遂盡撤沿江各營併力守九江矣塔公渡江圍潯城公別勦盪山遏湖口上援之賊攻梅家洲賊壘不能下會水軍自湖口入彭蠡盡燔賊艘賊亦潛以小舟縱火襲

我外江輜重船水師潰公回駐九江會對岸小池口有賊公與李公率勇千四百人進勦塔公往助之渡江賊大至刃旣接我前軍卻公急斂兵歸時十二月二十九日也五年正月北岸賊由黃梅廣濟上犯武昌復失會侍郎入南昌別賊由浮梁陷饒州及弋陽檄公往援勦時公所部分三營李公將左蔣君益澧將右公白將中營唐君訓方劉君希洛各率勇從之三月大戰五里亭克弋陽賊尋陷廣信公壁城西烏石山賊三路來犯公方築壘不爲動俟其疲乏乘之大獲翼日賊復大至見我軍不動亦不敢前相持兩時許忽起乘賊大敗之遂四面薄城賊啟東門遁初賊驟至民不及避殺戮甚慘公至不三日復其城土

民歡躍焚香遮道迎尋追賊至德興復其城賊趨景德鎮公引軍至賊遁未幾有義甯之役先是賊自崇通陷義甯江西大吏命都司吳錫光往援錫光故驍將至則全軍覆焉及是檄公進剿七月次梁口賊分兩路來拒我軍三伏以待之賊潰伏兵從山後出賊之抄我後者我軍反蹴其後斃賊六七百人越日進駐棋盤嶺以鼇嶺爲州城屏蔽急據之嶺距州七里左曰鳳凰山其右最高者曰雞鳴峰峰下卽西門擺百貨所輳也軍據此全城在目中矣十四日大戰以二千餘眾殪賊六七千賊奪氣閉城不出次日復戰又敗之盡焚江邊賊壘是夕賊棄城遁義甯旣克公上書會侍郎其略曰武昌居吳楚上游九江爲豫章

門戶今皆爲賊據崇通等處羣盜出沒江西之義甯武甯湖南之平江臨湘均無安枕之日欲克九江必由武漢而下欲克武昌必由崇通而入曾公因奏派公回援武漢而以彭三元曾承堯所部寶勇隸之九月進攻通城悍賊萬餘人見官軍至突出薄之公令軍士席地坐無譁待賊逼大呼奮擊斬賊將三人乃崩潰明日破城外三營奪門入克之尋進攻桂口令會攻通城之李原濬何忠駿等率平江勇駐守而自率所部克崇陽尋以分兵攻梯木山有濠頭堡之敗公整軍再戰復大捷進攻蒲圻開道出公安賊初戰不利殊死鬪內薄登城卒克之遂復咸甯自是武昌以南無賊蹤而逆渠石達開自崇陽乘虛入義甯江

西賊勢日棘矣。十一月師抵紫坊。與巡撫胡文忠公會合。又會提督楊公岳。斌於金口。商進取策。定議公率湘勇從東路壁洪山南岡。胡公從中路壁城南隄上。而令九溪營屯金口。爲水師犄角。時賊於武昌城外築堅壘十三。高者與城埒。公至方修壘。胡公亦始至。悍賊二萬從十字街出。胡公擊卻之。旋卻旋至。如是者數。公與李公潛師出蕩湖隄。分兩路繞抄。胡公所部見湘勇至。佯敗走。賊追之。旋反擊。則公等已抄出。堅壘北遂破。十字街營盡殪。追賊無脫者。於是賊皆縋城入。盡毀城。東南賊壘公與諸將議曰。西路入步街口。爲我軍通江要路。壘不破。則軍糧無由達。北路塘角。爲賊通興冶要路。壘不破。則賊糧無由斷。遂

造浮橋於鮎魚套。進攻入步街。以奇兵逼望山門。襲賊壘後。立平之。於是西路賊壘亦盡。尋與胡公合力攻城。並攻塘角。營毀漢陽門外一壘。焚其船廠。殲賊千。城賊由竄出。截我軍後路。公與李公夾擊之。又殺賊數百。環西北城。賊壘皆盡。公以仰攻不易。誘賊出城戰。設伏敗之。殲賊千。賊急以大隊衝我伏兵。公督兵橫截。又斃七八百人。是夜賊於望山門外葺石壘二。高與城等。我軍二路蹋平之。李公出窯灣。截賊餉道。賊七八千人由塘角沿湖下。抄其後。公令劉君騰鴻等出洪山之東。自率中營出洪山之西。夾擊之。殲賊千餘。賊自此閉城不復出。六年正月。公率中營移屯洪山絕頂。後右各營仍壁南岡。爲掎角。賊乘夜

襲中營已摩壘矣。我軍架石投之。登者皆殪。嗣是每夕輒至。公設伏痛殲。斬首四百。賊始不敢復襲。營二月。賊掘賽湖隄。劉君騰鴻出勦之。及長虹橋。遇伏力戰乃敗之。公欲分軍扼窯灣。賊出爭。大戰於小龜山。斬級六七百。遂以二營駐其地。明日賊由武勝門出。萬餘人。與我軍力戰隄上。殲賊數百。公追至城下。繞城審視。賊不敢出。二十九日夜。有大星隕於西北。三月朔。大霧不辨咫尺。次日城賊出。公親搏戰。走之已。而賊窺我守壘兵少。大舉來犯。公追賊至城下。賊礮如雨。中公右額。裹創戰逾時。歸而劇甚。日夜危坐不寐。越三日。病甚不能起。語謫謫皆時事。口占忠義祠楹聯。使人書之。忽開目。索紙筆。仰臥書曰。剋極時。站。

得定纔是有用之學。初八日晨起，汗出如瀉，握胡文忠手曰：武
漢未克，江西復危，不能兩顧，死何足惜！恨事未了耳。其與迪菴
好爲之迪菴李忠武字也。語畢而瞑。年四十有九，公貌樸，氣沈
究，心濂洛之書，通知世務，期見諸施行。在軍，毅然以滅賊自任。
所部將弁皆其鄉黨，信從者故所向有功。前後克城二十，大小
二百餘戰，其臨陣以堅忍勝，如其爲學或問制敵之道曰：無他，
觀大學知止數語盡之矣。左氏再衰三竭之言，其注脚也。烏虜
此所由能以書生摧巨寇，率生徒子弟數十人轉戰大江南，北
使湘勇之名遠出營兵上羞武夫之顏，關其口而奪之氣，而與
忠烈江公同張大國楚也。歟。公初以團練敘訓導，晉知縣，平安

履晉直隸州知州。克岳州。擢知府。賞戴孔雀翎。武漢克復。遷道員。尋授浙江甯紹台道。以田鎮戰功。加按察使銜。克廣濟黃梅。賞葉普鏢額巴圖魯名號。凡勇號皆由外請。此出特恩。異數也。義甯之役。加布政使銜。死事狀上。優旨照巡撫陣亡例。賜卹。父嘉旦。賞頭品頂戴。子兆作。兆升均。賞舉人。詔湖南湖北江西各建專祠。賜祭葬。子諡忠節。同治元年。詔湖南巡撫遣官卽家。賜祭一壇。三年。克復金陵。特旨加雲騎尉世職。所著小學韻語一卷。詩文集八卷。行於世。周易附說。讀孟子劄記。西銘講義。人極衍義。皇輿要覽。彙藏於家。

李忠武公事略

公諱續賓字克惠號迪庵湖南湘鄉人沈毅寡言笑身長七尺膂力過人習騎射能挽三石弓羅忠節公講學里中公折節受學依依不去咸豐三年忠節募勇殺賊公奉父命往佐之所練鄉兵號湘勇從平桂東土匪未幾粵賊圍江西行省侍郎曾公國藩檄忠節往援公佐謝君邦翰將右營邦翰邑諸生故忠節弟子抵江西戰死公代將其營所稱湘右營者也會土寇陷太和安福圍吉安遂同解吉安圍太和安福賊皆敗潰復馳勦永新事平議敘從九品師旋假歸甫三日趨衡州勦賊油榨墟進復永興次郴州敘功進縣丞初公所部僅三百六十人至是廵

撫。略。公。秉。章。命。增。爲。五。百。人。明。年。駐。衡。州。平。常。甯。土。匪。時。湘。潭。賊。敗。竄。曾。公。統。水。陸。軍。東。下。檄。湘。勇。從。六。月。抵。岳。州。壁。大。橋。時。湘。軍。兩。營。才。千。人。分。防。入。路。賊。日。夜。來。犯。提。督。塔。忠。武。公。約。會。攻。賊。巢。兵。始。交。我。軍。小。卻。賊。追。騎。大。至。公。左。右。止。數。人。戒。曰。毋。走。徐。行。陟。山。岡。賊。不。敢。逼。已。而。我。軍。漸。集。公。親。搏。戰。斬。大。旗。賊。數。人。餘。賊。爭。登。山。公。曰。是。可。取。也。手。劍。策。馬。大。呼。而。進。斬。賊。目。一。人。奪。其。旗。迫。北。十。餘。里。明。日。塔。公。至。營。指。所。部。贊。曰。好。勇。好。勇。與。公。語。良。久。嘆。曰。名。將。也。公。自。隨。羅。忠。節。從。軍。循。循。弟。子。列。退。然。若。無。所。知。人。無。有。異。之。者。至。是。始。以。知。兵。聞。時。官。軍。日。與。賊。戰。斬。馘。數。千。公。與。塔。公。曰。連。旬。戰。賊。不。得。擄。掠。食。且。盡。可。乘。

機薄其壘。明日遂進兵。風雨驟至。眾欲退。公曰。天助我也。與塔公並轡督戰。頃刻破數十壘。岳州平。擢知縣。賞戴藍翎。八月。同羅公克崇陽咸甯。進規武昌。二十一日。破花園堅壘。及鮎魚套賊營。明日克武漢。語在羅忠節傳。公擢直隸州知州。賞花翎。九月。同克興國州。擒僞進士胡萬智。斬之。十月。進攻半壁山賊巢。時南北兩岸。賊無慮十萬。鐵鎖橫江。賊舟麇聚。數十里。塔公師抵富池口。以賊阻浮橋。不克濟。湘勇及寶勇僅二千六百。人軍士多失色。逃者三人。公飛騎追還。揮淚斬之。軍心乃固。遂日大戰。殺賊數千。赭其巢。遂破田家鎮。擢知府。賞摯勇巴圖魯名號。授安慶知府。當是時。公知兵之名震天下。初。陸師分南

北進勦楊制軍需勦北岸。公隨塔公羅公勦南岸。曾公督水師。循江下。僞丞相羅大綱守廣濟黃梅。設卡壘數十。田鎮破後。僞燕王秦曰綱檢點陳玉成。皆往附之。勢張甚。總督不能前。塔羅兩公乃渡江北。勦公率爲軍鋒。每攻壘。與塔公逼賊壘十數丈。席地坐礮。彈如雨下。談笑自若。忽躍起曰。進則橫厲。無前當者。輒碎。遂復廣濟及黃梅。敗賊濯港。再敗賊孔壠驛。抵湖口。敗賊梅家洲。知九江未可驟下。從羅公移營廬山。十二月水師陷入彭蠡湖。外江失利。小池口賊勢復張。湘軍退回九江。公憤甚。請於曾公。自率千餘人。以歲除前一日渡江。攻小池口。僞城塔公亦率二十人偕往。因眾寡懸殊。戰不克。比暮始收隊而塔公獨

未返。公涕泣不食。誓渡江再決死戰。明日塔公竟覓舟返。無恙。時除夕三鼓矣。明年二月武昌復陷。當賊之從江北上竄也。公知北岸官軍不能敵。建議分南北兩軍夾江而剿。令塔公益募勇三千。合潯軍五千。專剿南岸。別選大將率潯軍三千。益募勇五千。直趨漢口。剿北岸。南北各自爲戰。一圖安慶。一圖金陵。庶大局克有濟。曾公聽其言。將以北岸屬羅公。以餉緇不果。亡何曾公入江西。饒廣告急。檄湘軍援饒。師抵章門。則饒匪已陷弋陽。三月。偕羅公進剿。敗賊大水橋。復弋陽。城賊趨陷廣信。追擊之三日。而城復移。軍景德鎮。會義甯州陷。江省大震。七月進攻義甯。奪鰲嶺。賊隘大創。棄州城遁。語均詳羅公傳。得旨記。

名以道員用八月同羅公回援武漢克通城崇陽而岳州警報忽至公分兵趨蒲圻之羊樓崗會李君杏春彭君三元戰死崇陽之濠頭堡衆議馳救公曰死者無及矣生者必來歸賊乘勝遠圖利在速戰宜堅守以持之俟其疲乃可擊也明日賊至我軍憑壘固守比暮賊將休公揮衆突之賊大潰追北至蒲圻翼日復其城並復咸甯詔加公鹽運使銜帥師趨武昌壁洪山十二月破塘角賊壘分壁小龜山六年二月與劉公騰鴻扼竄灣斬敵數千屢戰皆捷忽羅公中礮卒當是時軍中新失大帥人情洶洶賊乘機築壘保安門外礮子及五里墩大營湖北巡撫胡公林翼奏以公總督諸軍公涕泣受命遂掃平保安門賊

壘而江西瑞臨撫建等郡賊蔓延北及崇通蒲咸西及瑞昌皆
陷賊乃分湖勇四千屬曾公國華劉公騰鴻等由咸甯進剿賊
訶知之屢出城來犯公敗之賽湖隄又敗之小龜山雙鳳山秋
七月僞翼王石達開率援賊大至城賊將應之公分兵駐魯家
港防援賊遣壯士數百人執所奪黃旂誘城賊賊信爲援至出
城夾擊伏起殲敵過半及援賊既至禦之魯家港鏖戰三日城
賊鑑前失疑懼不敢出援賊遂敗奔追至小龜山斬首八百別
將與城賊鏖鬪賽湖隄公率師援之賊望其旂幟奔入城自是
堅閉不出公募民夫開濠掘江水入湖爲長圍斷賊接濟賊益
困十一月二十一日武昌復得旨以按察使用尋分兵追剿

克武昌。渡江克黃州。旋渡江克大冶。興國。遂直搗九江。林啟榮者。賊中最悍酋也。前歲塔公圍攻時。堅守弗下。至是仍率眾死守。夜無更柝。望火城以內。人聲寂然。官軍潛薄之。鎗礮應聲下。七年正月。公用攻武昌法。關壕困之。賊出城阻截。閱數月。濠始成。四月。皖賊上犯。號十萬。犯蘄州及黃梅。羅田。公分兵援蘄州。賊稍退。六月。賊傾巢上犯。蘄黃告急。賊於廣濟童司牌築壘。伺我軍。公渡江。勦平之。八月。破小池口。偽城。仍回九江。先是四年秋。賊奪江西戰艦。沈塞湖口。築壘石鐘山。爲浮梁。鐵鎖阻官軍。隔岸梅家洲。壘偽城。環巨礮。我軍仰攻不利。其年十二月。水師陷入內湖。會公益治水軍。章門檄彭公玉麟統之水軍。復振至。

是袁吉瑞臨。以次皆復。眾議會剿九江。公謂九江賊恃湖口相倚。角不拔。湖口九江不可得也。乃定計水陸夾攻湖口。九月八日。公遣其弟續宜率馬步軍攻梅家洲。僞城躬率師。揚言勦宿松。漏四下。迂道八里江。伏湖口後山。士卒皆捫蘿上。犁旦彭公率戰舟攻湖口。東游擊黃君翼升率戰舟攻梅家洲。提督楊公岳斌夾擊下鐘山。賊方悉銳拒公。率師從山椒破空下。賊大驚。遂盡殲其眾。湖口立復。梅家洲賊棄城遁。於是內外水師始會合。乘勝復彭澤。夷小姑。泐僞城。得旨除浙江布政使。返九江。適臨江逸賊竄興國。冒雪遣兵往援。擊走之。八年春。水陸晝夜攻九江。賊守益堅。我軍穴城。城崩爲磚石所壅。至稍遲。賊旋

堵禦。公令壯士數百人擁盾自蔽。先伏城濠。四月七日。地雷復發。勇自濠內奮呼登城。城立復殄。賊數萬無脫者。啟榮死亂軍中。礮其屍。九江平。加巡撫銜。賞穿黃馬褂。許專摺奏事。方九江之破也。公弟續宜率師攻麻城。未合圍。公以九江師益之。躬請假歸省。甫抵鄂。而悍酋陳玉成由安慶糾潛太英霍賊分擾蘄黃。警報日數至。未幾賊別道陷黃安。續宜分兵馳援。不下。公聞警。取道黃陂。約夾擊。敗賊黃安門外。賊遁。麻城賊亦不戰走。乃還鄂。時皖中糜爛。奉命越境勦皖。詔將軍都興阿總兵鮑超率馬步軍由宿松趨安慶。公由英山趨太湖。乃令續宜駐軍鄂渚。自帥八千人啟行。議者謂出境勦賊。宜益兵爲四翼。

各三。四。千。人。而。自。帥。中。軍。五。路。並。進。公。以。餽。餉。難。之。會。曾。公。奉。詔。墨。經。起。視。師。與。公。會。於。蘄。州。公。遣。將。朱。品。隆。唐。義。訓。分。千。人。爲。之。衛。議。者。又。謂。宜。調。鄂。中。守。礪。勇。以。換。畱。防。九。江。彭。澤。之。湘。軍。六。千。人。隨。同。勦。皖。公。以。更。調。需。時。日。卽。率。守。礪。勇。以。行。抵。太。湖。適。署。皖。撫。李。君。孟。羣。師。潰。廬。州。諭。公。及。都。公。改。道。援。廬。公。與。諸。將。議。曰。由。太。湖。救。廬。凡。數。百。里。廬。已。陷。師。至。緩。不。能。濟。急。且。太。湖。圍。撤。賊。由。豫。北。竄。是。腹。背。受。敵。也。遂。決。計。取。太。湖。埽。蕩。桐。舒。等。縣。直。趨。廬。州。時。咸。豐。八。年。八。月。也。是。月。克。楓。香。驛。小。池。驛。賊。巢。復。太。湖。乘。勝。復。潛。山。遂。進。擣。三。河。集。三。河。集。者。廬。州。要害。也。賊。築。城。傳。以。九。壘。用。悍。賊。數。萬。守。之。三。河。破。然。後。可。進。規。

廬州自克桐城後。公令總兵趙克彰率六營守之。又命副將謝永祐守舒城。於是所部僅五千人。九月二十八日抵三河。十月三日破賊九壘。斬賊數千計。忽僞英王陳玉成自江浦六合率大隊來援。僞侍王李世賢自廬州糾捻匪來援。眾十萬。連營金牛鎮白石山等處。烽火互數十里。諸將議退守桐城。公曰。軍事有進無退。當死戰。遂飛檄各防軍來援。未至。初九日。援賊蝟集門口。我軍迎擊至黎家渡。突遇大隊賊。天大霧。賊用眾技擊。我軍相繼潰。副將劉神山。參將彭友勝。游擊胡廷槐。鄒玉堂。杜廷光等先後戰死。公傳令軍中嚴守牆壘。無何各壘皆破。運同丁銳。義。馳入湘右營。誓同公死守。或勸突圍出。圖再振。公曰。軍興。

九年皆以退走損國威長寇志吾當縱橫血戰多殺一賊卽
爲國多除一害且吾前後數百戰每出隊卽不望生還今日固
必死有不願從死者請各爲計諸將士皆曰某等願從公死日
暮賊攻益急公上馬開壁馳擊殺賊數百人夜二鼓總兵李續
勲副將彭祥瑞率屬越壘衝出賊遂踞其壘決河隄斷我軍去
路公知事不可爲具衣冠望闕叩首取所奉廷旨及批
摺焚之曰不可使宸翰辱賊手乃躍馬入賊陣身被重創見
黃旗知爲賊渠曰此吾畢命處也馳入死之同知曾公國華知
府何君忠駿知州王君揆一同知董君容方知縣楊君德閻從
九品李君續藝張君溥萬皆殉焉道員孫君守信與丁君銳義

猶激厲士卒死守中右營至十二日水火俱盡營陷皆死之是役也文武官弁死者數百人兵勇數千人而中右一營爲尤多云事聞

上震悼。手敕曰。詳覽奏牘。不覺隕涕。惜我良將。不克令終。尙冀忠靈不昧。再生申甫。以佐予也。又詔曰。李續賓當賊犯長沙時。首倡團練。自後赴援江西湖北安徽等省。皆親歷行間。身先士卒。七年中。先後克復四十餘城。大小六百戰。所向無前。一時諸將中。無與倫比。朕以其威望素著。特命幫辦安徽軍務。方冀肅清皖北。淨掃狂氛。乃因進圖廬郡。先勦三河。苦戰旬餘。殺賊逾萬。適江浦六合廬江逆黨大股來援。以五千兵勇當十萬。

之。賊。將。士。傷。亡。從。容。赴。義。其。忠。勇。義。烈。之。氣。雖。死。猶。生。實。深。悼。惜。其。加。贈。總。督。卽。照。總。督。陣。亡。例。賜。卹。入。祀。昭。忠。祠。其。父。登。勝。可。給。一。品。封。典。並。賞。銀。五。百。兩。子。光。久。光。令。賞。舉。人。服。闋。後。送。部。引。見。並。於。湖。北。江。西。安。徽。湖。南。湘。鄉。各。建。專。祠。事。蹟。宣。付。史。館。以。示。朕。哀。恤。蓋。臣。至。意。尋。賜。祭。葬。予。諡。忠。武。公。崛起。田。間。以。平。賊。自。任。選。士。以。知。恥。奮。勇。樸。誠。敢。戰。爲。上。每。臨。陣。安。閒。靜。鎮。不。苟。接。刃。尤。能。以。少。擊。衆。大。小。數。百。戰。未。嘗。挫。衄。在。軍。號。令。嚴。明。所。至。百。姓。懽。迎。耕。市。不。擾。轉。戰。江。鄂。時。所。過。州。縣。不。見。客。不。索。供。張。廣。坐。中。言。不。輕。發。他。將。多。以。氣。節。相。高。公。默。然。深。藏。恆。曰。事。由。心。定。毋。張。皇。性。至。孝。克。九。江。後。乞。假。省。親。既。不。果。

乃爲迎養計。其父以書報之曰。軍事方殷。見當壹意報國。勿以我二人爲念。公省書掩涕。及拔營。握胡公手痛哭曰。吾無由復見父母也。左右皆感泣。軍中所餘廉俸。不以寄家。嘗資助會公營中。及彭公玉麟水師營。曾公國荃吉安營。約二萬兩。而元度時駐軍貴溪。餉罄盡。公亦以五千金寄助焉。與諸帥共事。和衷商榷。胡公撥撫標兵萬人。隸公戲下。皆心服樂爲之用。其臨陣專以救敗爲務。顧大局爲先。遇賊則讓人禦其弱者而已。當其悍者分軍。則以強者予人。而畱弱者以自隸。江楚兩軍每言肯接帶弱兵臨陣救人者。塔忠武後公一人而已。公薨年四十一。舒城難民覓其遺骸。送霍山大營。同治元年詔湖南巡撫

道官卽家。賜祭三年。克復金陵。賞二等輕車都尉。弟續宜。
字希庵。以戰功累官至安徽巡撫。卒諡勇毅。

鄧忠武公事略

公諱紹良字臣若湖南乾州廳人父士儼以歲貢任平江訓導行誼稱一時公自幼以將略自許充屯弁補鳳凰廳把總道光二十二年從征崇陽身被數創裳甲盡赤以功擢千總晉守備李沅發爲亂新甯公帥五百人追賊深冲洞賊悉銳逆戰公搗戈直前所部從之賊辟易仍據險旅拒公命將士乘晦銜枚登山噪而馳賊驚潰不知所爲蹂踐死者無算遂生擒沅發檻送京師賞揚勇巴圖魯名號換戴花翎擢都司二十九年粵賊洪秀全起金田屢敗官軍提督向公榮檄公往與爲犄角連敗賊索潭陶鄧墟賊竄潯州駐大黃江公麾兵渡對賊壘而軍別

賊數萬自牛排嶺來會。公引精騎五百橫衝其陣。張左右翼繼之。兩路賊皆敗。咸豐元年夏。公躡賊至象州之謝官村。賊巢環左右。皆山。公選壯騎奮而上。鏖戰箐谷中。奪其隘。破走之。乘勝追至永安州。賊迎戰死鬪。斬一酋。陣稍動。遂大敗。論功以游擊升用。旋授楚雄協副將。二年春。賊由大洞竄桂林。公空壁追躡。一日夜馳三百里屯西城。賊百道攻城。不下。解圍去。遂入楚。踞道州。諸路賊俱響應。勢大振。連陷江華。永明。嘉禾。桂陽。據郴州。公追及。與諸軍壁其三門。相持月餘。賊乃逸。由永興徑犯長沙。據城西南隅。民舍爲窟穴。日鑿隧道達城下。隱隱有鋤鑿聲。巡撫張公亮基急檄公入城。往來策應。九月二十九日。魁星樓側。

地雷發。城北十數丈。賊蜂擁緣陴上。公率敢死士躍而前。礮洞右臂。血淋漓不少。卻與賊搏戰。移時殪先登悍賊百餘。餘奪氣散走。督兵累土。城復完。賊知城堅不可下。率全隊渡湘而西。陷岳州。直趨武昌。公卷甲疾馳尾賊。三年春。奉旨擢壽春鎮總兵。隨授江南提督。赴鎮江勦賊。屬援賊大至。公兵不滿千。環顧無後應。遂奔上疏自劾。詔褫職。仍命助攻金陵。公率所部由雨花臺直薄神策門。斬獲甚眾。欽差大臣德興阿擬奏請公幫辦軍務。向公尼之。授公五百人。令援東壩。公單騎直搗賊營。瞋目大呼。賊眾潰亂。又遮敗之。采石。嗣駐軍黃池。賊引眾自蕪湖奄至。公及其未定。掩擊之。斬馘無算。追奔二十里。詔賞。

三品冠服並花翎。命赴徽州援至。則選精兵伏要隘。獨以數騎嘗敵。賊易其少。薄之。陽北伏。發。賊敗走。以次復婺源。黟。石埭。蕪湖諸縣。

上嘉其功。復提督銜。六年春。詔援揚州。冒雨渡江。率精銳薄城環攻。六晝夜奮身先登。及堞而墜者數四。誓必拔。卒引卒上克之。詔授浙江提督。幫辦皖南軍務。攻賊三叉河。拔其柵。會甯國陷。倍道往援。先部兵駐金珂橋。扼賊旁竄。大敗之。東溪橋進。次望牛墩。毒其汲道。賊以數千人來挑戰。公堅壁不出。俟近。偏外壕。乃縱擊之。斬悍賊數百。復潛師襲取七里崗。遂薄城下。毀羊馬牆。賊棄城走。旋進兵繁昌。營老鴉山。賊猝至。顧一曾銳。

甚躍馬刺之。賊大潰。追收之。何家灣。公念甯國爲浙藩離而徑。尤皖南咽喉。遂屯兵。遏其衝。相持至兩載。賊死爭不能入尺寸。八年春。公進壁灣沚。賊糾捻寇數萬。復踞黃池。公亟馳往。出賊不意。大破其衆。又敗之蒲塘夏村間。賊從奎潭遁。追賊之施家渡。時賊尙衆。砦鴉山南。分三道來攻。公亦分三道應之。賊大披靡。會浙事急。先後分兵赴援。賊乘虛突襲我橋石桅。不守。灣沚腹背受敵。援師至。自金陵者復一戰潰。賊騎四面陵騰之。公具衣冠北面再拜。舉火自燔其營死。而浙遂不能支矣。事聞。上軫悼。賜祭葬。命建專祠。賞騎都尉兼一雲騎尉世職。贈太子少保。予諡忠武。袁公三代如其官。嗚呼。自賊起。粵。

西長驛而東。穴有江左獨賴。岳湖南下水軍。輸糧糗。舳艫銜江。千里相望。不絕。用能乘機逐利。收奪失土。以成王誅。克夷大難。然當前嬰城時。穴火發。賊呼噪。乘城非得公奮身獨蔽。陷處抵擊之城。其危矣。保一隅遂全天下。公之功其偉矣。哉。雖不幸。賢志殞。未獲成大功。享有茅土。而比年荷社稷之靈。諸干城之力。卒平僭亂。草薶之無遺種。公亦可以無憾矣。公卒年五十有八。子亨先襲世職。敘光祿寺署正。

胡文忠公事略

公姓胡氏諱林翼字貺生號潤芝湖南益陽人父達源嘉慶己卯一甲三名進士官少詹事公九歲省詹事公京師卽投以儒先性理書而公少負才氣不甚措思也道光乙未舉鄉試明年成進士選庶吉士授編修庚子分校會試其年秋副文端公文慶典試江南因事降一級調用明年父憂歸服闋援例爲內閣中書捐升知府發貴州署安順府事道光之季寇亂漸萌嶺嶠以南賂越滇黔諸山中奸宄亡命狐噪梟嘯四出劫掠句結營兵胥役爲黨羽無敢捕治安順宋普里部也當雲南驛路向有冒頂大五小五諸匪聚眾爲姦暴公廉得其狀延訪士紳寄以

耳目偵知賊黨以歲除醺飲某所公親率健捕馳至其地獲著名渠魁余饒貴等其黨無一脫者任安順年餘先後擒巨盜三百有奇一郡肅然日坐堂皇訟牒至立與剖斷清積案至三百餘牘倡修義學十數區校輯節孝八百餘人彙報請旌建總坊通衢稟裁書吏規費安順二百年有司詳報節孝自公始調署鎮遠府府境跨有撫沅所屬皆苗獠其台拱清江黃平皆盜藪勢尤橫公治之如安順盜幾盡歲饑開倉平糴清社倉之被侵蝕者奉檄帶兵剿黃平革夷山等處苗匪獲盜首保鷺等三百餘名悉平其寨以勦匪功賞戴花翎會湖南新甯奸民李沅發爲亂奉檄赴黎平防堵事竣得旨補缺後以道員用

文宗卽位。詔大臣舉司道以下可大任者。雲貴總督吳文節公文鎔。貴州巡撫喬公用遷。皆以公名。應旋署思南府事。咸豐元年。補黎平府。府境毗連湖南粵西。山深箐密。盜出沒剽奪。捕之輒越境竄。公至日。延紳民及椎結左衽諸渠率。賜以酒食。詳詢民情地勢。令相連爲堡。擇立鄉正團長。牌長。互相稽覈。捕治諸不法者。是時廣西賊大起。永甯懷遠融縣環黎平西南界。皆賊公募壯勇扼隘防堵。辦團練千五百餘寨。建碉卡四百五十餘座。連屯相望。上言督撫請環邊要隘築堡守禦。以爲言。戰不如言。守用兵不如用民。用民力以自衛。不如先用地利以衛民。郡城故無儲積。勸富民捐穀置倉。以備城守。自後黎平疊被攻。

撲城卒不可拔。皆公練勇儲粟力也。三年秋。獲安榔匪滋事。以抗糧爲名。公以計解散脅從。而誅其首犯劉瞎麼。餘匪悉定。先是粵逆出永安。犯桂林。道郴。桂。茶。攸。犯長沙。東下湖南。巡撫張公亮基調公辦軍務。黔撫以公現辦黔匪。關全省大局。奏畱之。至是吳文節公由雲貴總督調任湖廣。仍調公帶勇來楚辦軍務。而王御史發桂亦言公捕盜鉏奸。饒膽識。所練勇一可當十。請畱楚帶勇勦賊。四年春。補貴東道公。以黔勇千人行次通城。而吳公已戰沒黃州。賊遂陷漢陽。以舟師上犯。陷岳州。湘陰。甯鄉。徑趨湘潭。湖南巡撫駱公秉章調公自平江通城回援省城。會忠武公塔齊布及楊公岳斌。彭公玉麟已破賊湘潭。而安化

土匪黃國旭等乘機抗糧爲亂。檄公往捕。計擒之。而賊之敗於湘潭者。悉所掠舟趨常德。公以所部赴勦。尋授四川按察使。仍留辦防勦事。是年。今協揆曾公國藩大治水。陸師東征。公從下岳州。巡撫駱公奏請免隨東下。仍駐岳州。接勦崇陽通城餘匪。調湖北按察使。秋。曾公復武漢。破田家鎮。進圍九江。檄公會討公自咸甯蒲圻大治興國東出瑞昌與羅忠節公澤南勦賊。湖口之梅家洲。五年春。湖廣總督楊需之師潰於廣濟。賊悉聚上竄。公請於曾公。以所部千餘人回援武昌。別以副將王國才一軍隸之。未至。漢陽失。公先以軍營沌口。檄國才軍由南岸趨武昌。會授湖北布政使。甫半日。城陷。國才至。偵得城賊暗號。卽夜

遣驍將詐爲賊裝。賺入城殺賊目數十。城幾復。天曙。賊聚益眾。公倉卒不能濟師。乃令國才退營金口。與彭公玉麟水師相倚。扼賊使不得上。犯旋奉。命署湖北巡撫時。武昌三次淪陷。公公私掃地。赤立。無可措手。公以謂不攻漢陽。則荆襄梗塞。不攻武昌。則咸蒲崇。通愈形滋蔓。乃添募兵勇。兼顧南北兩岸。賊謀襲金口營。斷官兵餉道。公分兵爲三路。設三伏。親率大隊。旋繞之。殲賊七百餘。生擒僞丞相陳大爲等。五月。賊分六路來撲。公遣將分路追剿。用伏兵抄襲賊尾。賊敗退屯紙坊。我軍進擣其壘。忽南風大起。礮齊發。賊狂奔入城。是役也。擒斬千餘。淹斃者無算。官軍直逼小東門。於紙坊金口犄角立營。賊伏不出。七月。

由金口渡江。以火龍船毀賊浮橋。水陸夾攻。遂克漢鎮。公親冒矢石。奪大別山賊卡。未克。會別賊由漢川至。焚漢口。公軍已一月不得食。至麥山。飢潰不數日。整軍復戰。移營大軍山。分駐新堤嘉魚。其時水陸萬人多。新募賊至。常數萬。見者奪氣。公從容談笑。雖挫而其氣彌厲。州縣殘破。餉源絕。文移指撥多不時應。爲書告鄰省求助。情詞深痛。人感其誠。稍資濟之。旋發其私家之穀濟軍食。是年秋。羅忠節公破賊江西之義甯州。以武昌居天下衝。長江險要所必爭。上書會公請赴援。會公以塔公舊部彭三元。普承堯等軍佐之。連克通城。崇陽。蒲圻。咸甯。公親會羅軍於蒲圻。併力擊賊。夷其壘。因偕回金口。與楊公岳斌議水陸。

進。攻。策。於。是。公。率。所。部。及。普。君。承。堯。唐。君。訓。方。諸。營。由。中。路。出。
省。城。之。南。駐。營。堤。上。羅。公。由。東。路。駐。營。洪。山。南。岡。留。九。谿。營。兵。
駐。金。口。護。水。師。以。當。西。路。敗。賊。於。五。里。街。再。敗。之。賽。湖。堤。復。分。
兵。攻。漢。陽。敗。賊。於。龜。山。尾。湖。堤。等。處。其。鮎。魚。套。賊。艘。亦。被。擊。沈。
自。是。武。昌。以。南。無。賊。蹤。而。督。帥。官。公。以。吉。林。精。騎。合。眾。軍。營。北。
岸。餉。道。日。通。軍。勢。亦。日。振。六。年。三。月。羅。公。以。攻。賊。受。創。卒。時。與。
賊。相。持。急。日。夜。搏。戰。不。少。休。而。軍。中。新。失。大。帥。公。與。故。浙。江。布。
政。使。李。忠。武。公。續。賓。拊。循。而。整。飭。之。氣。益。壯。先。是。悍。賊。石。達。開。
由。崇。陽。入。江。西。連。陷。瑞。州。臨。江。又。南。出。吉。安。東。趨。撫。州。建。昌。江。
西。郡。縣。無。完。土。屢。告。急。請。援。羅。公。一。意。規。復。武。漢。不。暇。應。至。是。

公念江西方棘而武昌猝不可復乃遣劉君騰鴻普君承堯出瑞州應援而令曾忠愍公國華統其軍軍糧並資給焉五月九日賊古隆賢領萬眾由葛店油房嶺後路援武昌約城賊舉火爲識夾攻我營公諜知之陽爲賊火城賊果出撲伏發奮殲殆盡乘援賊初至遣兵連夜薄之賊敗走七月石達開自金陵來援號十萬公分派水陸力戰都統舒保公領馬隊自江北來大破之平魯家巷賊壘四毀東湖賊艘七十有奇燔賊巢八十餘處追逐百餘里會襄陽土匪起連陷樊城穀城光化竹山興山遂與川匪合陷宜昌公遣舒公及唐公合數營往平之有議撫者公不謂然而事亦遂定時武昌賊窘公先與李忠武於塘角

密濤洪山青山等處掘長壕固守。其魯家巷花園五里墩石觜亦如之。城賊不得出。援賊不得入。我軍安坐以待。賊糧之盡。遂以十一月克復省城。殪賊萬計。生擒僞檢點古文新等十四人。先鋒悍賊八百餘。並逆黨五千餘得。旨賞頭品頂戴。實授巡撫。遂分兵收復武黃各縣屬。餘賊遁入九江北岸之小池口。公計。江。楚。胥。齒。相。倚。而。九。江。扼。長。江。之。衝。實。江。楚。門。戶。九。江。一。日。不。復。江。楚。一。日。不。得。安。枕。乃。令。李。忠。武。率。全。部。圍。之。分。兵。駐。黃。梅。廣。濟。蘄。州。間。以。遏。江。北。賊。而。公。自。駐。武。昌。調。度。當。是。時。官。私。廬。舍。焚。毀。幾。盡。諸。事。草。創。公。一。意。振。興。裁。通。省。浮。勇。以。節。糜。費。設。武。漢。重。兵。以。固。根。本。慎。選。賢。良。與。民。休。息。設。清。查。局。查。被。賊。

後州縣倉庫錢糧交代。設節義局。表章歷年殉難官紳士女。設軍需局。籌備疎征器械餉糈。挹提綱維。巨細畢舉。尤以亂民之生。由法度廢弛。吏敝民嫵。因循苟且。以有今日。不務討賊。則亂之流不塞。不務察吏。則亂之源不清。劾鎮道丞守以下數十人。與屬吏更始。禁應酬嚴。奔競崇。實黜華。於是在官者稍稍推廉。尙能知吏事矣。其籌餉有三。曰錢糧。曰鹽課。曰貨稅。湖北漕政久敝。官民交困。道光中葉。以還。徵收常不及半。公三次奏減章程。民以是輸將足額。湖南南北自淮鹽阻絕。率食川鹽。公分置課鹽局於宜昌沙市。又推行武穴老河口等處。視向來額課過之。仿劉晏用土人法。設局各市鎮。推收釐稅。嚴杜中飽弊。自是湖

北兵與餉強。天下七年。悍賊陳玉成自皖北上犯蘄州。諸營敗潰。賊徑趨蘄水。武昌大震。公急渡江赴黃州。收潰卒得數千人。而賊眾十餘萬。環巴河以東百餘壁。互數十里。時巴水大漲。惟三台河有石橋可通。公念賊渡河則勢蔓延。急派千人斷橋。扼河以守。而潛師出。迴龍山。遏其上。竄督諸軍合擊於孫家嘴。馬家河等處。賊大敗。狂奔出境。蘄廣肅清。會將軍都興阿公及李忠武公亦連破黃宿之賊。公視師九江。定方略。還省會。提督楊公克小池口。僞城次第收復。湖口彭澤東流各縣。九江勢遂孤。壘長壕圍之。八年四月。李忠武穴九江城。發地雷破之。礮僞貞天侯林啟榮等啟。榮竊據四年餘。塔忠武羅忠節屢攻不下。至

是乃悉獮。雍無遺種。

上嘉公調度有方。加太子少保。賊旋由六霍商城陷羅田。麻城。黃安。遣兵分道擊之。復其城。公以九江既復。安慶在所必爭。奏請數路進攻。楊公以水師出江面。都公由宿松望江逼安慶城。爲圍師。李忠武規復太湖。潛山。桐城。與都公犄角。會廬州失陷。北路請援急。忠武奉旨催促。遂分營畱守舒桐。自提五千人赴援。軍次三河。賊四面麇集。力竭戰沒。全軍陷焉。公時丁母憂回籍。都公以三河之敗。由公去軍無調度。請急起。公視師。總督官公亦疏請。公聞命。痛哭起行。徑次黃州。時各軍退保黃梅。人心惶惶。聞公至。皆以手加額。自壯。九年二月。進營上巴河。整

飭部伍謀大舉會石達開由南贛犯湖南掠郴桂而西趨寶慶號稱六十萬湖南告急公命李公續宜率所部往援而以都統舒公馬隊三百佐之又以水師二營佐湖南水師分扼諸河道寶慶圍速解公之力也已而協揆曾公由江西奉入川之命總督官公奏請與公併力圖皖乃定四路進兵策曾公循江而下爲第一路多公與鮑公超攻取潛山太湖爲第二路公出英山霍山爲第三路李公由松子關出商城固始爲第四路議者以鄂撫應駐黃州不宜出境公謂我奪情起復不赴前敵討賊則此出爲無名十月移營英山時太湖圍師方集逆首陳玉成來援眾數十萬多公鮑公等悉力拒戰賊來日眾圍鮑公營數

重聲息不通。公調金觀察國琛以八千人自松子關躡英山。踰潛山之天堂。橫出冒大雪。憑高築壘。表賊師而陣。賊聞見之大。懾而會。公亦自宿松遣師來會。十年春合擊賊於小池驛。大破之。遂復潛太。命諸將分下會金陵。師潰。蘇常皆不守。曾公授兩江總督。攜鮑公渡江。次祁門。謀經理徽甯。爲規復蘇常之本。乃以曾公國荃圍安慶。多公圍桐城。李公駐青草壩。爲兩軍援地。廣軍分而將軍都公又奉旨赴援淮陽。公悉力經畫。問兵事曰。惟我任問餉事。曰。於我取一無所。諉於人。十月。多公李公大破援賊於挂車河。公忿安慶久不下。自英山移營太湖。就近部署。度賊援皖不利。必謀深入腹地。以牽動諸軍。於潛桐舒霍山。

險。建立礮卡。守以民兵。命副將余際昌屯霍山。防中路。總兵成
大吉屯羅田。防北路。戒以賊至。勿浪戰。堅守待援。十一年二月。
賊果合捻匪。由六安霍山分路西犯。成總兵破之。松子關。戰其
魁龔瞎子。霍山守者違節度。戰敗。軍潰。賊取其旗幟。陷黃州。德
安。孝感。隨州。公策賊西竄。意在解皖。圍皖。解則大勢全去。墜
賊計。非宜。乃定策。遣李公回援。而圍皖益急。賊復分股回。略蘄
州。蕪水。黃梅。廣濟。以趨安慶。約城賊夾擊。精悍皆聚。公檄成總
兵下援。曾公亦從南岸遣將破賊集賢關。剗平赤岡嶺。賊壘四
座。悍賊數千悉斬之。磔逆首劉鎗林。而援賊之由桐城來者。又
連爲多。公所殲。蓋安慶爲金陵屏障。久陷。賊中僞英王陳玉成。

據爲老巢。室家在焉。故救之不遺餘力。及見我懷桐潛太之師。皆屹然不動。鄂疆雖暫被援。而黨分力弱。兇悍被殲。城中糧已垂盡。勢大蹙。適南岸賊復由武甯義甯內犯。輿國大治。南及崇通省城岌岌。公病嘔血。憊甚。率師回援。而皖圍終不解。既抵省。南岸賊聞風遁。八月朔。遂克安慶。曾公以力主圍皖之議。推公首功。詔加太子太保。予騎都尉世職。桐城廬江舒城。以次攻下之。而孝感德安黃州各郡縣賊。亦先後擒斬。楚境旋清。而公則嘔血不止。病不可爲已。

文宗皇帝遺詔至。公攀慕悲泣。病益劇。遂以八月二十六日薨於武昌節署。年五十。遺疏人優詔悼惜。追贈總督。照總督例。

賜卹。入祀賢良祠。湖北及湖南原籍均建專祠。子子勛。俟及歲時。由吏部帶領引見。未幾復奉諭。翰林翼戮力疆場。勛勞懋著。數載以來。恢復本境。援勦鄰氛。整軍經武。以死勤事。允宜亟予褒揚。著宣付史館。以光簡冊。胡子勛。賞舉人。一體會試。用示朕篤念謏臣至意。尋賜祭葬。諡文忠。同治元年二月奉旨。賜祭一壇。並命原籍督撫遣官前往家祠。賜祭。公狀貌英偉。目閃閃如巖下電。威棱懾人。聰強敏給事。至應機立斷。無畱難。苟當理。艱煩重大。毅然自任。不以例文拘束。自言守鎮遠黎平諸劇郡。捕治盜賊。爲民興利除害。皆默自程課。惟恐大吏聞有所牽掣。清釐湖北漕糧。議者以州縣公私取給。積弊且二百

年不宜驟革。公手自釐定。以部定漕折爲率。因其地之肥磽。之繁簡。加重輕焉。歲爲民間省錢百四十餘萬緡。爲庫項增銀四十餘萬兩。提存節省銀三十餘萬兩。民與國兩利而爲州縣裁革。陋規幾盡。使有以自給。故亦無怨者。籌辦鹽課釐稅。皆白定章程。所派官紳。各視才地所宜。時加手書訓戒。綜覈名實。精力絕人。每於理財之中。暗寓察吏之法。謂取民贍軍。使商賈同仇敵愾。卽以教忠。使局員潔已奉公。卽以興廉。又時時戒飭屬吏。俾知稼穡之艱難。知小民之情僞。其治軍務。明紀律。尤加意將才。曰。爲統將。必明大體。知進退。緩急。機宜。其次知陣法。臨敵決勝。又其次勇敢。此大小之分也。又曰。兵之繫者。無不罷將之。

貪者無不怯。觀其將知其兵。觀其兵亦知其將。生平以天下爲己任。乘機赴會。斷行無疑。援江西數千人。援湖南萬人。皆精兵。時鄂中賊方逼。餉且缺。公一意調遣。軍糧皆自任之。卒收全功。武昌始復。卽規取九江。九江復。卽規安慶。越境千餘里。討賊制其死命。督撫之以全力。援勦鄰省。自湖北始也。圍九江。賊由江由皖犯鄂者三。圍安慶。賊由皖由江由豫。全力犯鄂。州縣城陷者十餘。公屹不爲動。或遣將分援。或躬親督勦。從容肆應。算無遺策。其於闔屬事務大小。各軍強弱。以及鄰省之優劣高下。燭照數計。洞然於心。而尤汲汲以獎拔人才爲事。屬吏一行之善。隨登薦牘。手書褒美。以寵異之。士有志節才名。潛伏不仕。千里

招致務盡其用。嘗密薦才堪大任者十有六人。多蒙擢用。又以
興國布衣萬斛泉等。砥礪廉隅。不求仕進。奏請獎勵。詔賞斛
泉等七品冠服。有差。嘗言國之需才。猶魚之需水。鳥之需林。人
之需氣。草木之需土。得之則生。不得則死。才者無求於天下。天
下當自求之。故公所特薦。不盡相諱也。在武昌。專意吏事。懲貪
惡。任廉能。吏治蒸蒸日上。病急時。猶引賢退。不肖數人。時論皆
以爲允。公自爲湖北巡撫。念國家多難。而身負重任。益務繩檢
其身。較其尺寸。毫釐而待人。一秉大公。推誠相與。無粉飾周旋。
嘗曰。吾於當世賢者。可謂傾心以事矣。而人終樂從曾公。其至
誠出於天性。感人深故也。然諸將并在事者。樂公之鼓舞振興。

天下士從公爲尤盛。而其言不自足如此。立寶善堂以延賢俊。之至者。察其材。隨宜任使。與人言。虛中翕受。苟可行。必研窮其利害。而竭盡其底蘊。與所常共事文武諸公。厯六七年之久。披肝瀝膽。無幾微間隔。遇事苦心調護。俾人人有布衣昆弟之歡。而自視欲然。常若不足。語及人才優劣。喟然曰。世有伯樂而後有千里馬。願吾才智不足有爲。賢者終不我應耳。庚申秋。都城戒嚴。急謀人衛。會款議成。詔止其行。

文宗升遐。遠在木蘭。哀詔久未下。公憂思旁皇。中夜扶病起立。翹望京師。輒流涕。病因是加篤。然猶終日危坐。考求兵事。吏事之要。汲汲施行。願左右嘆曰。聞道苦晚。今雖稍有所見。而不

及行者多矣。始曾公嘗奏胡某才勝臣百倍。及上公死事狀。謂其堅持之力。調和諸將之功。綜覈之才。皆臣所不逮。而尤服其進德之猛。嗚呼。此豈今之人也哉。所著讀史兵略若干卷。奏疏文集若干卷。家故有田數百畝。自筮仕貴州。誓先人墓。不以官俸自益。至是位廵撫。將兵十年。於家無尺寸之積。詹事公曾著弟子箴言。公承其志。爲箴言書院。悉以家所藏書納其中。使人知務實學。建胡氏家學。教其族之子弟。故舊親戚。仰給於公者。歲常數十家。嗣子子勘襲職騎都尉。

何文貞公事略畢附毅公金科

公諱桂珍字丹畦雲南師宗人道光戊戌進士選庶吉士年甫冠乞假歸娶士類榮之旋授編修督貴州學政擢侍講入直上書房公所學以宋儒爲宗拓城實先生克勤著書明理學流派曰正宗公續之於朱陸異同辨最晰又以己意增輯西山真氏大學衍義手繕進優詔納之廣西盜起數抗疏言軍事得失論前大學士某前總督某誤國不宜發軍前疏畱中天下想望風采咸豐四年五月出爲徽甯池太廣兵備道時安慶久陷改省會廬州仍被踞巡撫福濟公提督和春公軍廬屬之店埠公所治在江南阻於賊大府遂疏畱江北檄公募勇隨征餉無所

出久之得二百餘人率以西至霍山號召鄉兵得三千有奇。激以忠義以十月二日破李兆。受於霍城東追擊至麻埠。又五日。至流波疇。李兆受者故河南捻匪魁也。有眾數萬。至是爲公破。又檄商城固始諸團丁扼歸路而自率所部進追。捻黨大慙。兆受與馬超江等相繼降。散脅從萬計。百姓懽呼餽糗糧不絕。先是大府檄公援廬江。檄未至。廬江陷。竟勅公落職。軍民皆不能平。會曾侍郎國藩督楚師克武漢大破賊田家鎮。遂圍九江。公通牒楚軍言戰狀。侍郎具疏於朝。副都御史袁公甲三時軍臨淮。亦欲資公兵西與楚師會。公至蘄水矣。爲地方吏所尼。不得前。居無何九江軍失利。武昌再陷。侍郎入江西。遂鬲絕不相。

聞公孤軍轉戰。鬪霍閒。五年正月。克蕪水。旋克英山。殪悍酋田金。爵大府。檄君駐英山。然公任事八閱月。支見銀三百兩不足。供一夕。炊民兵相從日多。又益以兆。受降卒無所得食。初人日餉麪一斤。遞殺至四之一。猶弗給。五月十一日。師遂潰。方兆受之降也。公請縻以官秩。大府難之。至是絕糧。意不能無缺望。徒感公忠誠。不忍背。無何超江爲土人所殺。兆受籲公拘其仇。弗得益大志。則設位哭弔。捻黨糜集。於是皖豫諸帥爭以兆受反狀聞。榜於衢。購兆受頭千金。兆受詣公。自陳。公推赤心。拊慰之。稍定矣。會當道以密書由驛達公。屬先發制之。書爲兆受得。兆受謂公賣已也。遂以十一月三日伏兵。戕公於英山之小南門。

焚其尸。屍之從死者四十七人。公正命時有白氣如疋練自屋瓦出。逾時乃滅。年三十有九。後二年當事復招兆受降。累擢江南提督。而公之死無過問者。公以書生提空名殺賊。無餉無軍資。無賞罰權。而日與反側子居。本萬萬無生理。失廬江在奉檄前。遽入公罪。卒以一紙速之死。蓋公在翰林劾權貴。中外久灰目。及外任。初謁大帥。侃侃陳軍事。若將爲之師者。然以是積陳公而公且死不之悟也。禍所從來微矣哉。同治三年秋。江甯克復。逆渠盡殲。曾公疏陳公率鄉團勦賊時。飢餓艱危。歷人閒未有之苦辛。以機事不密爲叛人所戕。天下冤之在已。尤引以爲疾。竊請加恩旌卹。得旨俞行。賜祭葬。賜諡文貞。命。

建祠英山。予騎都尉世職。其時同一疏得請加。卹者有升。用游擊。臨元鎮都司呼爾察巴圖魯畢公金科。

畢公字應侯。籍臨元文貞公鄉人也。少入伍。以征開化苗匪功。敘藍翎外委。粵賊起。隨副將王君國才出師湖北。敗賊天門丁。司橋。累擢都司。賞花翎。咸豐四年冬。曾公督師克武昌。大破賊田家鎮。檄公及國才隨忠武公塔齊布攻九江。未下。五年正月。別賊犯武昌。國才回援。忠武才公畱弗遣。公驍健。亞忠武能。匹馬陷堅。穿出敵陣之背。戒從卒勿隨。行人亦莫敢隨者。羣賊率熟視不敢動。十二月。戰臨江樟樹鎮。克之。六年正月。別將失利。功弗竟。曾公檄令防饒州。五月。大捷章田渡。與主防者不相。

中公所部兵單爲所牽掣。六月，饒州陷。公憤甚，增募壯士，決死戰。未十日，復饒州，獲賞勇號，補臨統鎮都司，以游擊升。用時主者遷秩去，公獨筦防務。屢被賊殲，其魁賊畏憚之。婦孺皆德公倚爲固。會皖南賊大至，踞景德鎮。歲且暮，士不宿飽，忌公者復齟齬之。期以破賊後，給饗。公憤鬱不自聊，思更立奇功，自震褻。遂以七年正月元日，率千人進攻。越二日，抵鎮，阻水而陣。黎明，率壯士十人濟。時賊臥未起，入市寂然。公舉火，未及烈，搜剿後市，伏賊起，十人者亡其七，傷者三公，喋血鬪，手格殺十數人。賊不敢逼，用火器環攻之。及王家洲死焉。年二十有五，尸被殘閱十有八日，前傷卒三人者，始以公殞事聞。賜卹如例。始公

之赴饒也。自以孤軍千人不足當一面。謁請於曾公。願留戲下。弗遣。曾公慰遣之。許不久調回。既而不果。調公竟死。曾公痛惜之。爲勒碑紀其事。至是以曾公請得加贈總兵銜。賜祭葬。予諡剛毅。詔立祠景德鎮。

趙忠節公事略

烏虜自粵寇稱亂以來海以內死封疆死職死綏者僂指不能
畢數。若其以鄉紳毀家紆難率民兵登陣效死抗數千萬之賊
血戰三年解圍者三殺賊萬計迫行省陷列郡盡淪於賊糧罄
援絕猶死守孤城六閱月力竭被執幽繫經年百折不可回卒
罵賊以死若湖州趙忠節公者洵一代奇烈爲時所創見者已
公諱景賢字竹生歸安人父炳言道光六年進士官刑部侍郎
公少豪邁負奇氣不拘小節讀書慕古俠烈士喜任人所難有
機權臨事輒能斷道光甲辰舉人以父子異籍被議黜入貲得
復授宣平教諭改官內閣中書未赴丁父憂閉門讀禮鄉人未

之奇也。同郡徐中丞有王獨器之曰：君有應變才，將爲國柱石。慎自愛。公亦以時事多故，思得一當以自效。咸豐三年，賊陷江南，江浙震動。詔舉行團練法，公獨任其事，輸重金爲衆倡，得旨加道銜，以知府發甘肅用。未幾，甯國克復，湖州得解，嚴十年二月，賊覆甯郡，陷廣德，直趨湖州。公時在蘇州，聞警馳歸，與湖州守瑞春、歸安令廖宗元、烏程令李樹等籌守禦。當是時，士皆虛伍，官無見錢，計莫知所出。公曰：事急矣！今市肆雖空，百貨未盡徙也。宜權取充軍實，事成有以謝父老，否亦免爲盜齎耳。遂下令有不聽取者，治以軍法。不半日，事粗集。公曰：未也。今城外民屋如櫛，賊至窟其中，城將不能守。乃縱火燬之。江南援師至。

賊已圍攻西北城。公部署既定，納韃刀，乘城誓死。遂約援兵夾擊，斬賊數千。圍三日而解。時二月十七日也。有詔以道員用。賞額爾德木巴圖魯名號。賊由埭溪攻杭州，越十日，外城陷。巡撫羅公遵殿死之。將軍瑞昌公死守滿城，未下。會提督張公王良自金陵馳援，過湖州。公遣將引道，復杭州。王壯愍公有齡繼爲巡撫，壯愍夙知公才，至是深相倚。湖防事一以委公，乃益繕城隍，備器械，造戰艦，築牛馬牆，分勸各屬鄉鎮，泊團練。閏三月，遣將復長興、德清、安吉、孝豐、武康五縣。時蘇常迭警，援軍皆調歸，惟存新軍三千。公悉心校練，且添募。四月，蘇州陷，延及嘉興，分兵駐南潯鎮，以扼其衝。未幾，僞輔王楊輔清自宜興、溧

陽太湖來犯。衆十萬。沿城大掠。火光燭天。刁斗聲聞數十里。公閉城堅守。意氣自若。會記名道蕭公翰慶。自石埭來援。轉戰賊境五百里。將至湖州。馬蹶被害。所部敗散入郡城。公拊而用之。兵力稍厚。時賊衆已圍五門。公親督隊開北門出血戰。數晝夜。斬馘多。賊遁。二次解圍得。旨以道員記名簡用。五月。聞張公玉良攻嘉興。公卽帥師出南湖進攻吳江之平望鎮。踞賊十數壘。據守之。思卽復蘇州。成不世功。僞英王陳玉成忽自太湖窺湖郡。公急回救。賊反乘之。師潰。賊復踞平望。并犯南湖鎮。公再集民兵擊走之。六月。分兵克廣德州。時杭州圍解。敗賊仍竄湖屬。十月。省城再被圍。公帥兵召援。團甫解。入謁王。壯愍忽湖防。

告急卽馳歸。賊已至南門之峴山。副將劉仁福者故興臺也。自平湖潰歸。通款於賊。率廣勇二千自昌化來。僞爲援兵。謀入城。內應。公偵得。實陽治具款之。而止其兵。城外陰簡精卒出。令人東竹筴於腰。爲識圍而盡殲之。磔仁福於市。竿其頭示賊。賊爲奪氣。解圍遁。分擾西南各鄉鎮。皆擊卻之。十一月嘉興烏鎮之賊分途來擾。雙林鎮等處王壯愍遣副將文端來助。勦合民兵轉戰十餘日。悉破其壘。詔以三次解圍功。賞按察使銜。十一年正月。遣兵再克長興。有賊自宜興陸路來犯。敗之。會太湖之洞庭東西山失陷。全湖皆賊。有長興既不能守。而北路七十二渡港時被擾。遂於大錢口添駐水師。聯絡民兵。通餉道。大小

數十戰皆告捷。五月，大股賊來踞菱湖鎮。公親督水師，破船分路夾擊，大敗之，奪賊船數百艘，生擒數百人。七月，平望賊竄南潯鎮，與石門賊兩路來犯，皆走之。九月，賊來益眾，乃督水陸出鏖戰。五晝夜，賊始敗退。適太湖賊又來犯，夾浦連敗之。回郡，忽報杭州被圍，賊營互六十里，餉道絕。遂親督水陸軍往援，連破賊卡二十有奇，終不能達城下。洞庭東山賊偵公南向，乘虛犯大錢口。公急回顧，且戰且退。既至，大敗之，奪賊船二百餘艘，始遁去而從逆之烏鎗船匪肆掠雙林鎮，復遣兵聚蠡之亡何杭州陷。公歎曰：「湖郡成孤注矣！惟當效死勿去，以報國恩耳。」遂與在城文武紳民誓死守。眾皆曰：「惟公命，傷忠王李秀。」

謀遣書招降公立斬之以書達上海呈江蘇巡撫轉奏始奉簡授福建督糧道之命時四面皆逼賊鋒惟畱大錢口一線路十二月二十七日大雪三晝夜冰厚數尺如平地礮艦膠不能動同治元年正月二日賊乘夜來犯大錢口遂爲賊踞自此內外隔絕餉道不能通矣賊屢受湖防之挫死傷山積恨次骨掘公父墓相戒勿近攻先是賊陷名城率用地道湖郡地勢低掘隧三尺卽見水技無所施又四面環大河雲梯衝車無所用惟築壘樹柵漸進逼爲坐困計二月朔公選死士三千誓解城圍由南北門出擊各埽十餘壘獲賊糧運入城自是賊糧不復屯近處而城內外水陸兵勇尙八千有奇男婦十一萬餘口糧且

盡越二日密奉飭赴福建新任及賞加布政使銜之恩命軍氣復爲一振蓋是時

上甚惜公才寄諭垂詢江督曾公國藩密令輕裝赴任移其捍衛桑梓之力以固閩疆公感泣誓死益堅密寄帛書至上海報其叔炳麟有眾志成城守死善道之語且云使我家出一良臣不如出一忠臣公之志蓋素定矣自三月以後軍民羅雀掘鼠食草根樹皮皆盡公言笑如常時縣丞某欲通賊事露立擒斬之有搜掠者仍按軍法五月三日城陷公大呼曰死無憾死我十數萬軍民爲憾耳賊渠譚某擁至局公冠帶見賊喝曰速殺我毋殺軍民譚曰亦不殺汝公拔刀自刎爲所奪執之去僕

陸二自刎死。公被執至蘇。幽諸獄。邏禁甚嚴。求死不可得。賊浚
辱脅降。不屈。李世賢復爲下士狀百計。誘說不爲動。遂有遁歸
之意。譚逆不可世賢赴江北時。誠勿殺。譚稍稍善視之。公見輒
詈罵。一日攜常熟地圖以詢。遽投之火。二年三月賊自太倉敗
歸。揚言公將襲蘇。譚逆懼。十八日日晡招公飲酒。半詰公曰。汝
通妖兵耶。公曰。我本官兵。何謂通。汝欲獻蘇州耶。公曰。蘇本
大清土地。何謂獻。卽又曰。汝死期至矣。公仰天大笑曰。求之一
年而不得。今何幸也。連舉數巨觥。罵益厲。譚逆舉洋鎗對擊其
胸而殞。年四十。有二賊具棺瘞之。公身材不踰中人。貌偉異。口
可容拳。大小百餘戰。皆親冒矢石。天性好殺。嘗曰。吾得殺人下。

酒乃快事耳。所俘賊皆浮白斬之。後見曾公國藩解散歌始悟。脅從皆獲免。湖州既陷。廷旨數詢公下落。死事聞。優詔褒。閔且曰。趙景賢係在籍紳士。無守土之責。集團禦侮。每戰必捷。迨至孤城困守。糧餉軍火俱盡。仍堅持數月。力盡被執。賊匪誘脅百端。矢志不移。卒以身殉。勁節孤忠。可嘉可憫。其改照巡撫陣亡例。從優議卹。且賜諡。於湖州建專祠。其長子趙深彥一併附祀。事蹟宣付史館立傳。以彰忠藎。次子趙瀆彥潤彥滋彥添彥淶彥均俟及歲時。送部引見。尋賜祭葬。予諡忠節。公在繫作絕命詩四章。有云。亂刃交揮處。危冠獨坐時。又云。厚貌徒爲爾。孤忠矢靡他。僞忠王本欲送公歸。致書以漢壽亭侯歸漢。

爲言公斥其儼不於倫且曰歸我者之爲知己不如殺我者之
尤爲知己也初杭州旣陷公知事不可爲盡遣其家屬出而身
居守深彥年甫十二寓湖南聞湖州失大慟服毒死南撫爲奏
請旌卹